



O sin cuasi ai 16 dal mê e come simpri il countdown, achì sul sît, al tache a cori plui svelt. A mancjin doi dîs, trê oris e trentecinc minûts a la scjadince de conte dal mê, il regâl che noaltris di Contecurte o fasin a ducj i iscrits ae nestre mailing list aromai dal mê di Zenâr. Sino pronts?

Sì, al mancje dome il dissen pe cuvierte, e daspò **ducj i tocs de conte a varessin di jessi a puest**. L'Ostîr al à rivât a meti adun la conte, che come che o podevis intuî dal titul, chest mê si clame FROS.

La coghe Fuguline, ancje je simple indafarade, e je rivade a meti dongje un biel articul sul argoment di chest mê, e us podin za dî che la conte e je ambientade nuiemancul che inte zornade di joibe ai 17 di Setembar.

La Sartore, difati, e je seneose in spiete di meti mans sul lavôr par impagjinâ e meti adun la cuvierte. L'argoment? Chel no si spie, ma cuant che miercus di sere us rivarà la conte inte pueste eletroniche (e mi racomandi, cjalait de caselute des *promozioni*, che nol è spam) o

scuvierzarêš ancje une altre sorprese.

La sorprese no si spie, ma e je colegade a **une altre Lotarie**, parcè che chê altre volte si sin divertûts cetant a dâ i numars che o vin decidût di dâju ancje chest mêš. I premis? Ah, ben po, o vin fat lis robis in grant e o vin cjatât come sponsor dai premis nuiemancul che **FRIÛL POINT!**

Sì, propite lôr, i autôrs des maiutis e des mascarutis plui furlanis di dut il Friûl!

Ma **ce vêsò di fâ par partecipâ a la Lotarie? Nuie, se o sês za iscrits ae Liste di Contecurte**. Se invece no sês inmò iscrits, alore movêsi! Iscriveitsi! Al baste someti la vuestre mail intal spazi di pueste, achì sul sît, e dopo visâsi fi fracâ di sì a la mail che us rivarà. Cussì no dome o podês partecipâ a la **Lotarie di joibe di sere (estrazion in direte facebook tor lis 19.15)** ma ogni lunis, come a che ore chi, o ricevarêš lis gnovis de Ostarie, par no pierdisi nissune iniziative e nissune conte.

Ben po... al è dut. Anzit. No. Se no us vin stiçâts avonde, ve chi che us lassin l'incipit de conte di Setembar, che insome... al è une vore potent! E no stêt dâsi che no vês voie di viodi cemût che e va indevant.

FROS

Si lis viôt rivâ di çampe.

Lis cuessis secjis e crotis a strenzin il cjalin dal pêl dai becs. Lis lenghis di fûr, vuiscjadis dal vint, si jemplin di moscjis, che lôr a çupin e glotin colp par colp intun pacjâ di lavris che no àn dincj di platâ. I voi no son voi ma sieraduris di lûs tombadice robade ai cimitieris e folcjade dentri des grispis che ur tegnin dongje la muse tant che cusiduris. Bocje, nâs, sbeçule, cerneli, flât, smursiei... no si ju discern, ma si ju intive, li dentri, a marcolâsi e misturâsi, ribaltâts flaps e ledrôs, ma grampâts in chel berlarili e in chê asse che i sblancje lis àinis. I ombui sclagns e scalembri a crochin e crochin dentri dal crocâ di çucui, lis ongulis a sgrifignin i cuars vuicant e cualchidune si spache, sanganant, ma no mole la

bestie. Si tegin dûr cui cjavei, cui pêi, cui sbrendui di piel slichignote des tetis intant che a sdrumin une blave une vît un ort o un filâr di pomis. Intune man un baston e un fros a svintulâ, sflochetât dal aiar. Une gjernazie cence divignince e pudôr che si fâs brentane e cence dûl e fische e sbreghe e sbridine.

